



Osterøy kommune
Rådhuset
5282 Lonevåg

Osterøy - oppstart av planarbeid og offentlig ettersyn planprogram for kommunedelplan for oppvekst

Me viser til oversending frå kommunen med frist til 30.06.2017 for å koma med uttale.

Kommunedelplanen skal etter det opplyste leggja tydelege føresetnader og rammer for utviklinga av kommunen i eit framtidsperspektiv og ha med seg alle møtepunkt og område for temaet oppvekst. Hovudmåla for planarbeidet er å leggja til rette for at komande generasjonar kan utvikla seg til å verta barn, unge og vaksne som meistrar notida og framtida, samt peika på verkemiddel og moglegheiter kommunen har til å påverka og forsterka ei slik utvikling.

Vidare er det peika på at planarbeidet må konkretisera tverrfagleg og tverrsektoriell samhandling for å nå fastsette mål.

Det er foreslått sju hovudtema som vil ha delmål knytt til seg for å nå hovudmåla i planen. Kommunedelplanen skal vidare fastsetja strategiar og tiltak for å oppnå konkrete mål i handlingsdelen, samt foreslå evalueringssystem eller andre metodar for å følgja opp dei aktuelle målsettingane.

Fylkesmannen sine merknader

Nokre få utvalde omsyn er framheva i føremålsparagrafen i plan- og bygningslova, slik som omsynet til barn og unge sine interesser, jf. plan- og bygningslova (pbl) § 1-1 femte ledd. Tilrettelegging for gode oppvekst- og levekår er òg utheva som ei viktig oppgåve i pbl. § 3-1 første ledd bokstav e og rikspolitiske retningslinjer for barn og planlegging. Fylkesmannen er såleis positiv til at kommunen går i gang med det viktige arbeidet med ei heilskapleg tilnærming til teamet oppvekst.

Slik Fylkesmannen ser det er planprogrammet dekkande for dei tema som planen skal vurdere vidare. Opplegget for medverknad er omfattande og ser ut til å vera eigna for å nå tak i både barn og unge, foreldre i tillegg til fagfolk innanfor ulike område.

Under opplistinga av kunnskapsgrunnlag er det vist til folkehelsestatistikk/profil 2016. Me går ut ifrå at det viser til kommunen si folkehelseoversikt som vil vera eit godt grunnlag for vidare planlegging.

Me ønskjer lykke til med den vidare planlegginga.

Med helsing

Rune Fjeld
assisterande fylkesmann

Arve Meidell
seksjonsleiar

Brevet er godkjent elektronisk og har derfor inga underskrift.